

大乘寶要義論卷第九第十

星十

宋三藏朝散大夫諡號少卿光祿大師惟淨等奉詔譯

如入楞伽經中大慧菩薩問如來藏佛言大  
慧何故汝今問於如來自性明亮清淨本來  
清淨如是之說如來具三十二相在一切有  
情身中如無價寶為弊垢衣之所纏覆蘊處  
界衣纏覆亦然彼貪瞋癡不實計執此之垢  
染是無常法是不堅牢是不究竟大慧白佛  
言世尊外道所說神我之語何故不能等比  
如來藏語以外道說神我是常我能造作離

繫自在而永不滅彼說如是神我之語佛言  
大慧外道我語不可等比如來藏語大慧然  
我所說實際涅槃無生空無相無願等諸句  
義如來應供正等正覺為諸愚者令離無我  
驚怖之法故以方便說無分別無所對礙如  
來藏門此中亦非未來現在諸菩薩摩訶薩  
著我所作大慧譬如窰師取土成泥用水及  
繩并其工具勤力所作成種種器如來亦復  
如是住法無我離分別相故以種種勝慧方  
便善巧相應或說如來藏或說無我法以多

妙巧文句言詞譬喻而說以是緣故外道我  
 語不可等比如來藏語大慧又我所說如來  
 藏語但為降伏諸外道輩執我語者故以方  
 便說如來藏如是等輩何故意樂隨在無實  
 主宰計執見中若於三解脫門意樂具足即  
 能速證阿耨多羅三藐三菩提果以是義故  
 如來應供正等正覺所說如來藏法與外道  
 我語不可等比是故大慧為令外道離諸見  
 執使其當得隨順如來無我藏法此所宣說  
 是謂無上成就究竟之法是謂諸菩薩空無

生無二無自性法是謂甚深之法若有宣說  
 及受持者即能普攝一切大乘經中甚深之  
 義何以故此甚深法於一切法一切經中攝  
 故此經又云大慧此空無生無二無自性相  
 普攝一切諸佛及一切經典故月燈三昧經  
 中如來說偈云 第十  
 三千大千世界中 我所宣說諸經典  
 種種文句皆一義 故復不能周徧說  
 乃至一切諸如來 及廣宣說多種法  
 於一句中修學已 一切修習得成就

一切諸法皆空性 若人於義明解了  
此句義中學所成 而諸佛法不難得  
於甚深法能信解 獲得一切勝福生  
諸有世間出世間 辦所作事至成佛  
寶授經云復次妙吉祥菩薩經百千劫善  
修六波羅蜜多具善巧方便若有人於此正  
法勤求聽受者比前福蘊此復倍多何況以  
無所求心聽受書寫爲他廣說金剛般若波  
羅蜜多經云佛言須菩提於汝意云何殞伽  
河中所有沙數彼一一沙爲殞伽河是諸河

中所有沙數寧爲多不須菩提言諸殞伽河  
尚多無數何況其沙佛言須菩提我今實言  
告汝若善男子善女人於諸殞伽河中所有  
沙數如是沙等世界以七寶滿爾所世界持  
用布施諸佛如來是善男子善女人以是緣  
故得福多不須菩提言甚多世尊甚多善逝  
佛言須菩提若有人於此正法乃至受持一  
四句偈爲他說者其福勝彼梵王問經云仁  
者若善男子善女人於如來所樂修福事者  
應當於此正法聽聞信解及受持等<sub>三</sub>能獲

得色相富盛廣多眷屬於法自在人天之中  
受諸快樂舍利子說般若波羅蜜多經云舍  
利子白佛言世尊若復有人得聞說此般若  
波羅蜜多聞已信解者是人即於菩提得不  
退轉慈氏菩薩言世尊若有聞說此般若波  
羅蜜多聞已信解者是菩薩即得近佛果位  
妙吉祥菩薩言世尊若有聞說此般若波羅  
蜜多聞已信解者見是菩薩當如佛想一切  
罪染惡作而悉解除一切業障皆得清淨於  
甚深法能生勝解如來藏經云佛言迦葉最

極十不善業者所謂一者假使有人緣覺爲  
父而興殺害是爲最極殺生之罪二者侵奪  
三寶財物是爲最極不與取罪三者假使有  
人阿羅漢爲母而生染著是爲最極邪淫之  
罪四者或有說言我是如來等是爲最極妄  
語之罪五者於聖衆所而作離間是爲最極  
兩舌之罪六者毀訾聖衆是爲最極惡口之  
罪七者於正法欲雜飾爲障是爲最極綺語  
之罪八者於其正趣正道所有利養起侵奪  
心是爲最極貪欲之罪九者稱讚五無間業

是爲最極瞋恚之罪十者起僻惡見是爲最  
極邪見之罪迦葉此等是爲十不善業皆極  
大罪迦葉若一有情有如是罪具行十不善  
業者如來卽爲宣說因緣和合之法使令解  
入爾時亦無我人有情壽者之想若能解了  
此法無作無爲呈十如幻之法離染清淨自性明  
亮解一切法本來清淨於一切法淫信勝解  
者我不說彼有情墮於惡趣何以故無諸煩  
惱聚性可得生已卽時一切破散故知諸煩  
惱一聚因緣和合所生生已卽滅若起心遣

除而諸煩惱隨卽有生若如是信解者彼復  
何有罪之分位無處容受故若言有諸罪障  
而可住者無有是處持律優波離尊者問降  
魔品云汝諸惡魔云何是苾芻眞持律行魔  
言尊者若苾芻了知一切法畢竟調伏諸罪  
本來無前後際離邊際故若犯墮罪及餘惡  
作而悉解除勿生堅著以如是法爲他開示  
彼之所有五無間罪尚悉蠲除況復少略破  
戒垢染解是法律者不爲客塵煩惱所染生  
出離想知諸煩惱非內非外亦非中間非離

深智能除煩惱離深之性亦不可遣智者如  
實觀諸煩惱猶如浮雲風飄流散隨所向方  
何適何住又諸煩惱如水中月徧計影像對  
現其前又諸煩惱是黑闇境界慧燈光明而  
能照破又煩惱賊竊害色相如夜又羅刹若  
深固作意如實觀察即無所住又諸煩惱常  
伺其便若不深固作意即煩惱增長於空無  
相無願智慧法中即不違害又於如是諸煩  
惱中智者以智於彼深著煩惱諸有情所對  
住其前起悲愍心為說無我無有情法令其

離深此即是為真實持律阿闍世王經云佛  
言阿難我今實言告汝若有造五無間罪者  
得聞如是正法已能生勝解我不說彼人有  
業及業障阿難以要言之此所宣說甚深正  
法應生勝解廣大稱讚數於彼彼經中專勤  
聽受不離善巧方便菩薩應當如是勤行說  
甚深法是故慧及方便二法不離是為菩薩  
相應正法維摩詰經云無方便慧縛有方便  
慧解何謂無方便慧縛若菩薩於空無相無  
願法中調伏其心不以相好莊嚴佛土成熟

有情此即是為無方便慧縛何謂有方便慧  
解若菩薩能以相好莊嚴佛土成熟有情於  
空無相無願法中調伏其心習力勤行而不  
疲懈此即是為有方便慧解何謂無慧方便  
縛若菩薩於諸見煩惱生起隨逐有所住著  
然復發起一切善根迴向無上菩提此即是  
為無慧方便縛何謂有慧方便解若菩薩於  
諸見煩惱生起隨逐斷諸有著而發起一切  
善根迴向無上菩提悉無所取此即是為有  
慧方便解此等慧及方便二法和合當知皆

是菩薩之行云何是菩薩行所謂非凡夫行  
非賢聖行是菩薩行在於生死不為染汙在  
於涅槃不求寂滅是菩薩行雖求四諦智亦  
不非時取證涅槃是菩薩行雖觀內空而常  
思念於三有中示現受生是菩薩行雖觀無  
生而不入正位是菩薩行雖攝一切有情而  
不滌著是菩薩行雖行於空而常勤求諸相  
功德是菩薩行雖行無作而勤修一切善行  
獲得輕安是菩薩行雖修止觀之行而不畢  
竟墮於寂滅是菩薩行雖轉法輪示現大般

涅槃而不捨菩薩所行之行是菩薩行凡如是等皆是菩薩所行之行降魔經云復次所有諸菩薩摩訶薩最上正行謂即勝慧智增上相應若方便智即普攝一切善法之行勝慧智者即無我無人無有情無壽者無儒童等方便智者即成熟一切有情之行勝慧智者即徧攝諸法之行方便智者即正法攝受之行勝慧智者即一切佛法界無分別行方便智者即一切佛法尊重供養承事之行勝慧智者即一切佛刹如虛空行方便智者即

一切佛刹功德莊嚴一切佛土妙莊嚴之行勝慧智者即一切賢聖修無為行方便智者即於一切師尊所起尊重心施作種種作用之行勝慧智者即觀察佛身無漏之行方便智者即修佛相好之行勝慧智者即觀察一切行無生無起之行方便智者即常思惟於三有中示現受生之行無盡意經云何等是為菩薩方便復何等是菩薩勝慧所謂若入定時起大悲所緣深固之心觀察有情此即方便若於定中住寂徧寂此即勝慧若入定

時起大悲心隨順佛道此即方便若無所有  
依止觀察此即勝慧若入定時觀察普攝彼  
一切法此即方便若觀法界無所分別此即  
勝慧若入定時佛身莊嚴所作現前此即方  
便若觀察法身分位此即勝慧維摩詰經云  
佛言慈氏菩薩有二相一者信樂雜句文飾  
二者不畏甚深之法如實解入是爲二相若  
菩薩信樂尊重雜句文飾者當知是爲初學  
菩薩若復於此清淨甚深經典普攝種種文  
義差別之門聽受宣說生勝解者當知是善

薩久修梵行復有二法是即初學菩薩爲自  
毀傷不於甚深法中調伏其心一者於昔未  
聞甚深經典聞已驚怖生疑亦不隨順返生  
輕謗作如是言我昔未聞此法從何所來二  
者於大法器宣說甚深法者善男子所不樂  
親近亦不尊重或時於中密說其過是爲二  
法復有二法菩薩雖信解甚深之法亦自毀  
傷不能速證無生法忍一者輕毀初學菩薩  
不爲攝受不爲法擇復不教誨二者雖信解  
甚深之法而不習學亦不尊重不行財施法

施攝受有情是為二法此中應知若諸有情  
 解入諸佛菩薩大威德力斯極難得何等是  
 為菩薩大威德力維摩詰經云維摩詰言大  
 迦葉所有十方世界現作魔王者皆是住不  
 可思議解脫菩薩以善方便成熟有情故現  
 魔相又十方世界或有菩薩從其求乞手足  
 耳鼻血肉筋骨頭目身分妻子奴婢人民國  
 邑象馬車乘凡如是等或來求者皆悉給施  
 菩薩以如是相故行逼迫此等皆是住不可  
 思議解脫菩薩迦葉譬如龍象蹴踏非驢所

堪凡夫亦復如是不能如是逼迫菩薩而菩  
 薩者乃能如是逼迫菩薩

大乘寶要義論卷第九

大乘寶要義論卷第十

宋三藏初集大教沙門少卿光梵大師 惟淨 等奉 詔譯

如華嚴經云法界行願分位宣說菩薩無盡  
 佛種世界世尊普徧智境界音聲如來從彼  
 刹中來至世尊釋迦牟尼如來之前出現菩